

Goran Salihović: Mnogima smeta ovo što radimo



Ne postoje nesporazumi na relaciji Tužilaštvo BiH - Sud BiH jer svi postupaju u skladu sa zakonom, izjavio je Goran Salihović, glavni tužilac Tužilaštva BiH.

"Nisu tačne informacije da optužnice koje radi Tužilaštvo BiH, a tiču se ratnih zločina, nisu kvalitetne. Kvalitet optužnica mjeri se potvrđenim optužnicama, a u ovoj godini Tužilaštvo BiH ima 46 potvrđenih optužnica protiv 86 lica. To je najbolji rezultat otkako postoji Tužilaštvo BiH", rekao je Salihović u intervjuu za "Nezavisne".

NN: Koliko je optužnica potvrđeno u protekle tri godine?

SALIHović: U protekle tri godine nijedna optužnica nije vraćena i sve su potvrđene. U 2012. imali smo 24 podignute optužnice za 42 lica, u 2013. godini 26 optužnica za 49 lica, a to sve s istim brojem tužilaca. U 2014. kad smo dobili nove tužioce imamo 46 optužnica i 86 optuženih lica, a moja procjena je da ćemo do kraja godine doći do 60 potvrđenih optužnica, a bit će preko 100 osumnjičenih lica. Mnogima smeta što se radi u Tužilaštvu, posebno kriminalcima i ratnim zločincima, ali i nekima u politici.

NN: Zbog čega ima nesporazuma između Vas i predsjednice Suda BiH?

SALIHović: Mislim da nema nikakvih nesporazuma. Predsjednicu poštujem, ona je starija, dama je i poštujem njenu funkciju. Imamo dobre odnose. Možda je moja izjava pogodila neke ljude iz pravosuđa kada sam rekao da nisam zadovoljan odlukom Suda zbog ukidanja dijela presude u slučaju "Turković". Nisam zadovoljan odlukama o

ukidanju presuda o korupciji, ali u smislu toga da li poštujem odluke Suda i odluke svakog sudije - poštujem. Nema nikakvih sukoba u Sudu.

NN: Posljednjih mjeseci kritikuje Vas javnost zbog velikih akcija hapšenja koje na kraju ishode puštanjem aktera da se brane sa slobode. To su slučajevi poput Čauševića, Lijanovića, Bosnića...

SALIHović: To za nas nije minus. Tužilaštvo predlaže mjeru pritvora. To je mjera kojom se obezbjeđuje da lakše dođemo do optužnice. Nije problem što predložimo pritvor, a Sud ne prihvati, ali u svim ovim slučajevima Sud je odredio pritvor, pa ga onda ukinuo, jer su smatrali da nema više razloga za određivanje pritvora i mi tu ne vidimo problem. U nekim slučajevima se žalimo, u nekima ne. Što se tiče Bilala Bosnića, Tužilaštvo se žalilo i vraćen je u pritvor u petak ujutro. Lijanovićima je bio određen pritvor, pa je Sud prihvatio i onda sam ukinuo pritvor. Puštanje iz pritvora ne mora značiti da je neko slobodan, čak dobijamo prostor da još temeljitije radimo.

NN: Kada možemo očekivati podizanje optužnica u slučajevima "Bilal Bosnić i drugi", "Lijanovići" i "Pandora"?

SALIHović: Predmet "Bosnić i drugi" je sad nastao i mislim da imamo sve elemente da ubrzo podignemo optužnicu. Isto tako je i za Lijanovića i Čauševića. Nisam siguran da će biti do kraja godine, ali će biti veoma brzo. Znam da javnost očekuje spektakl kroz hapšenje i za njih je to gotova stvar. Berlusconi su 25 godina optuživali za korupciju i na kraju je amnestiran. Vrlo je teško. Moramo za to imati podršku kompletne zajednice - od političara, medija, građana, od svih. Diže se buka što radimo, da ne radimo prozivali bi nas što ne radimo. Ali kad počnemo da radimo to je kao da dirate u zmijska gnijezda. Stavite ruku i 100 zmiya vas ugrize, ali mi idemo dalje, obučemo rukavice i nastavimo.

NN: U medijima se dosta pisalo o tome da je Kemal Čaušević, svjedok Tužilaštva, svjedok pokajnik. Ima li istine u tome?

SALIHović: Čaušević nije svjedok, niti je pokajnik. On je optužen. To su priče koje nisu tačne. On je u proceduri, mi radimo i optužnica će biti vrlo brzo. Posljedica tog predmeta je vrlo dobra za prihode BiH. Taj podatak svi zaboravljaju. Svi kažu da nema predmeta iz domena korupcije. Ljudi zaboravljaju: jedan od najvećih predmeta je bio "Kekerović", iz njega je i nastao "Čaušević", a iz toga može nastati nešto drugo. Takođe ste vidjeli da je prihod od indirektnih poreza porastao za 680 miliona KM.

NN: Nema optužnice za paljevinu zgrade Predsjedništva BiH u februaru ove godine. Hoće li je biti i kada?

SALIHović: Ne mogu o tome ništa reći, ali mislim da će tu biti optužnice u onom dijelu u kojem smo mi nadležni a to je državni nivo.

NN: Krajem novembra protiv Vas je podnesena krivična prijava u Tužilaštvu FBiH. Da li ste upoznati s time i znate li možda o čemu je riječ i ko i zbog čega Vas je prijavio?

SALIHović: Siguran sam da ovo što radimo u Tužilaštvu BiH mnogima smeta. Ta prijava je anonimna i podnesena je nenadležnom organu ako se radi o državnom nivou. Bilo je prijava protiv mene i prije, biće i poslije. To uopšte ne shvatam ozbiljno zato što nema nikakvih elemenata. Transparentno radim, otvoren sam. Mislim da je prijava napisana ne bi li se neko prepao u Tužilaštvu. Međutim, mi smo samo još gori. Nema teorije da nešto može uticati na nas i na naš rad. Protiv mene je bilo koliko hoćete prijava i sve su odbačene, a biće ih još mnogo. Isto tako podsjećam sve da je lažno prijavljivanje krivično djelo.

NN: Hoćete li na to odgovoriti?

SALIHović: Na sve ono što je laž i što je kleveta odgovaram putem Suda i dobijam presude. Tu nema dileme, ja ću svakoga tužiti.

NN: Možete li nam reći šta je s istragom koja se vodi protiv Atifa Dudakovića, bivšeg generala Armije RBiH, i kada će ona biti okončana?

SALIHović: Taj predmet je kod Dragana Čorlije. Mislim da se na njemu počelo raditi. Činjenica je da se na tom predmetu nije radilo godinama, tek sada se počelo i to je sramota. Pošto je Dragan izabran na drugu funkciju, predmet ću morati dati nekom drugom pa ćemo vidjeti.